

Supervizor za Brčko uvodi izmjene Statuta Brčko Distrikta

Supervizor za Brčko, Susan R. Johnson, je danas izdala Nalog kako bi uvela tehničke amandmane na Statut Brčko Distrikta Bosne i Hercegovine, nakon konsultacija sa poslanicima u prelaznoj Skupštini Brčko Distrikta, članovima prelazne Vlade Brčko Distrikta i Policije Brčko Distrikta.

Statut Brčko Distrikta, ključni dokument za implementaciju Konačne arbitražne odluke, i osnivačka povelja Brčko Distrikta, je stupio na snagu 8. marta 2000. godine. Statut je zasnovan na demokratskim principima vladavine prava, efikasne i transparentne javne uprave i vlasti koje odgovaraju zahtjevima građana.

Nakon četiri godine primjene, postalo je jasno da postoji potreba da se pojedine odredbe Statuta ažuriraju kako bi odslikale razvoj političkih događaja i bile u skladu sa potpunijim zakonima Distrikta.

Amandmani predstavljaju tehničke izmjene Statuta u cilju poboljšanja efikasnosti Vlade, Policije i pravosuđa i veće otvorenosti rada i odgovornosti. Amandmani uključuju sljedeće izmjene:

- Pored zvaničnika koji moraju podnijeti godišnji finansijski izvještaj o svojim ukupnim prihodima, imovini i dugovanjima (i načinu sticanja istih), sada to moraju učiniti i svi članovi njihove uže porodice. Takođe, zvaničnici su dužni da podnesu svoje izvještaje Skupštini koja ih daje na uvid javnosti.
- Proširena je lista zvaničnika čiji rad na kraju godine zvanično ocjenjuje Skupština i sada obuhvata nosioce

funkcija stvorenih poslije 8. marta 2000.god. Ovi zvaničnici i dalje ne smiju biti na bilo kojoj drugoj funkciji u javnom ili privatnom sektoru za vrijeme trajanja njihovog mandata.

- Povećan je broj odluka za čije je donošenje potrebna tropetinska većina u Skupštini i sada obuhvata: a) Poslovnik o radu Skupštine, b) budžet Brčko Distrikta, c) usvajanje i izmjene zakona Brčko Distrikta, d) izbor i smjenjivanje svih lica izabranih od strane Skupštine, e) saglasnost Skupštine na imenovanje ili smjenjivanje zvaničnika u skladu sa Statutom i zakonom, f) stavljanje veta od strane Skupštine na gradonačelnikova imenovanja šefova Odjeljenja.
- Gradonačelniku je dato više prostora za odlučivanje o organizovanju Vlade Distrikta na najracionalniji i najefikasniji način, u okvirima raspoloživih sredstava Distrikta.
- Skupštini je dato ovlaštenje da smijeni gradonačelnika prije isticanja mandata, samo iz opravdanog razloga.
- Organizacija Policije Distrikta je racionalizovana ostavljanjem jednog zamjenika šefa Policije.

Supervizor Johnson odaje priznanje vlastima Brčko Distrikta za posvećenost u radu u skladu sa Statutom i osiguravanje poštovanja zakona Brčko Distrikta.